

## ANEXO 1

### ORDENANZA MUNICIPAL REGULADORA DA LIMPEZA DE TERREOS E SOARES E DE PROTECCIÓN CONTRA OS INCENDIOS FORESTAIS E DISTANCIAS DAS PLANTACIÓNS.

**Artigo 1.- Fundamento e natureza.**- A presente ordenanza dítase en virtude das facultades conferidas na Lei 7/85, de 2 de abril, reguladora do réxime local e ten por finalidade establecer as condicións dos terreos e soares e das distancias das plantacións de especies arbustivas no termo municipal do Concello de Pontedeva

**Artigo 2.- Limpeza dos terreos e soares e as súas condicións sanitarias.**

- a) A limpeza dos soares e terreos rústicos é obrigación dos propietarios ou posuidores. De non efectuarse así esta limpeza, o Concello procederá a retirar o lixo ou desperdicios á costa daqueles, sen prexuízo das sancións que procedan legalmente.
- b) Os propietarios dos terreos incluídos nos perímetros dos núcleos rurais do Concello, segundo a determinación resultante do Plan de Ordenación do Medio Rural (P.O.M.R) deberán mantelos rozados e limpos e nas condicións de seguridade e salubridade que non supoñan risco para a saúde, debendo proceder á súa desinfección e desratización periódica.
- c) Os propietarios ou posuidores de terreos que se atopen a menos de 30 metros de calquera edificación, deberán mantelos rozados e limpos de xeito que eviten a iniciación ou propagación do lume.
- d) Queda prohibido botar lixo ou residuos sólidos nos soares e terreos, tanto de propiedade pública coma privada.
- e) As obrigas dos parágrafos anteriores, incumbirán tanto as persoas físicas coma as xurídicas.

**Artigo 3.- Distancias das plantacións.**

a) Nos terreos rústicos do termo municipal, segundo a cualificación do P.O.M.R as distancias mínimas das plantacións, segundo as distintas especies son as seguintes:

1.- Especies de coníferas ou resinosas:

A eidos ou montes	4 m
A viñedos ou labradíos	8 m

2.- Especies de frondosas e outros tipos:

A eidos ou montes	4 m
A viñedos ou labradíos	10 m

3.- Especies de eucaliptos:

A eidos ou montes	12 m
A viñedos ou labradíos	35 m

4.- Árbores froiteiras:

A eidos ou montes	2 m
A viñedos ou labradíos	4 m

- b) Nos terreos que se cualifiquen como de solo núcleo rural non se poderán plantar especies arbustivas, agás árbores froiteiras e ornamentais que deberán gardar en todo caso a distancia de 6 metros ós lindeiros.
- c) As plantacións que se fagan en todo tipo de terreos, deberán gardar, respecto dos bens

e instalacións de dominio e uso público, as seguintes distancias:

1.- A estradas municipais e camiños públicos, non se poderá plantar especie ningunha a distancia inferior a 4 metros da aresta exterior da mesma e a camiños de ferradura e sendeiros a distancia será de 2 metros.

Con respecto a estradas nacionais, autonómicas e provinciais, estarase ó que se estableza na lexislación sectorial.

2.- A pozos de abastecemento de auga, fontes e mananciais, tanto públicos como privados, non se poderá facer plantacións a menos distancia da que se sinala:

Eucaliptos	25 m
Fronosas	15 m
Froiteiras	5 m

3.- A outros bens e instalacións públicos non se poderán facer plantacións a menos de 5 metros, calquera que se xa a especie arbustiva.

**Artigo 4.- O órgano competente para sancionar.-**

1. As sancións polas infraccións tipificadas nesta Ordenanza, son competencia do Sr. Alcalde ou do Concelleiro en quen delegue.

2. Toda persoa natural ou xurídica poderá denunciar diante do Concello as infraccións da presente Ordenanza en relación coa materia a que esta se refire.

3.- As responsabilidades derivadas do incumprimento das obrigas sinaladas nesta Ordenanza, serán esixibles non só polos actos propios, senón tamén polos daquelas persoas de quen se debe responder.

**Artigo 5.- Clasificación das infraccións.-**

1. Considéranse infraccións administrativas en relación coas materias as que se refire esta Ordenanza, os actos ou omisións que contraveñan o establecido nas normas que integran o seu contido.

2. As infraccións clasifícanse como leves, graves e moi graves, conforme se establece nos artigos seguintes.

**Artigo 6.- Infraccións leves.**

a) En xeral, o cumprimento dos requisitos, obrigas e prohibicións establecidas nesta Ordenanza, que non estean recollidos como graves ou moi graves.

b) Non proceder á limpeza dos terreos unha vez notificada a obriga desta e transcorrido o prazo sinalado.

c) Non realiza-la roza ou limpeza de terreo ou franxa de terreo sinalada en metros nesta Ordenanza.

**Artigo 7.- Infraccións graves:**

a) A reincidencia nas infraccións leves.

b) Non proceder á roza e limpeza de terreos ou soares unha vez notificada a súa obriga e logo de lle ser notificada a valoración do custe desta roza e limpeza, cando haxa risco inminente de incendio para vivendas e veciños.

c) Non permitir o acceso ó persoal de vixilancia a inspección dos terreos, no caso de comprobación da denuncia.

d) A realización de plantacións sen garda-las distancias establecidas na presente ordenanza.

e) A realización de plantacións nos lugares expresamente prohibidos na presente ordenanza.

**Artigo 8.- Infraccións moi graves.**

Cando nas infraccións graves concorran ademais algunha das seguintes circunstancias:

- a) A reincidencia nas faltas graves.
- b) Grave repercusión nos recursos naturais ou deterioro destes.

**Artigo 9.- Sancións.-**

1. Sen prexuízo de esixir, cando proceda, as responsabilidades de carácter penal ou civil correspondentes ás infraccións dos preceptos da presente Ordenanza, en materia de limpeza de soares e plantacións, as sancións serán as seguintes:

- a) Infraccións leves, multa dende 30 a 400 euros.
- b) Infraccións graves, multa dende 401 a 600 euros.
- c) Infraccións moi graves, multa dende 601 a 3.000 euros.

2. Nos supostos de non cumprir coas obrigas da presente Ordenanza, ou na reincidencia de calquera das infraccións moi graves, o Concello procederá a toma-las medidas protectoras e correctoras, subrogándose a administración nas obrigacións dos propietarios, e pasándolles as costas ó seu cargo.

**Artigo 10.- Determinación da contía das sancións.-**

1. Para determina-la contía da sanción atenderase ás circunstancias concorrentes nos feitos que as motivaron, tales como a natureza da infracción, grao de intencionalidade e reincidencia, así como aqueles factores que se poidan considerar coma atenuantes ou agravantes.

2. Será considerado reincidente quen houbera incorrido en infraccións das mesmas materias nos doce meses anteriores, e nas que recaera resolución.

**Artigo 11.- Réxime transitorio.** As plantacións arbóreas existentes dentro do perímetro dos núcleos rurais deberán acomodarse ó disposto na presente ordenanza no prazo de dous anos, contados a partir da entrada en vigor desta.

**Disposición derradeira.-** A presente ordenanza entrará en vigor unha vez publicado o seu texto íntegro no Boletín Oficial da Provincia (BOP), e haxa transcorrido o prazo sinalado no artigo 65.2 da Lei de bases de réxime local.